

26. september 2020

UKA2022/15b

Naalakkersuisut siulittaasuata ammaanermi oqalugiaataa tunngavigalugu oqallinneq.
(Naalakkersuisut siulittaasuat)

Ataqqinartut Inatsisartunut ilaasortat, Inatsisartut siulittaasuat, Naalakkersuisut, maani allaffissuarmi sulisut, najuuttut minnerunngitsumillu nunaqqatit sinerissami isorartoqisumi avannaarsuarniik, kitaa, kujataa nunattalu kangia tikillugu malinnaasut tamassi.

Inatsisartut ukiaanerani ataatsimiillutik ammaanersiorneranni Naalakkersuisut siulittaasuata ammaalluni oqalugiaataanut imartuumut Siumumiik qujavugut.

Aasaq qaangiuppoq, naasut asinngalerput, aput nakkaallattaalerpoq ukiorlu takkukkaluttualerpooq. Neriuppugut aasaq ilaqtariillusipissarsiffigilluarsimassagissi.

Inatsisartut ukiakkut ataatsimiinnerat qilanaaralugu kiisami aallartiinnakaseqaaq Siumumiillu neriuppugut ataatsimiinneq politikkikkut angusaqarfialluartumik torersumillu naammassiumaarippuit. Eqqaamajuartigu nunarput inuili pillugit qinigaanikuugatta nunatsinnut nunaqqatitsinnullu kiffartuussisussaatitaalluta.

Manna periarfissaq iluatsillugu Siumup tunngaviusumik siunertai naatsumik saqqummiutilaassavakka:

- Pilersikkumallugit inuaqatigiit ataqatigiissut, ilatsiinnartuunngitsut, eqeersimaartut napasinnaalluartullu.
- Inuaqatigiittut akisussaaqataanertik qamuuna misigisimalluarlugu ilumoorfegalugulu innuttaaqataasut.
- Pilersikkumallugit inuaqatigiit nunamik tunniussinnaasai akisussaassuseqartumik atorluarlugit avataaniillu pisariaqartitatik iluaqutigalugit imminnut napatittut.
- Pilersikkumalugit Nunatsinni inuaqatigiit kikkunnut tamanut pitsasumik atugassaqartitsisut naligiimmillu periarfissaqartitsisut.
- Pilersikkumallugit Nunatsinni inuaqatigiit naligiissitaasut sumi inunngorsimaneq, arnaaneq, angutaaneq upperisaqarnerluunniit apeqqutaatinnagit.
- Pilersikkumallugit Nunatsinni inuaqatigiit aningaasaqarnikkut politikkullu nammineersut.

- Kalaallit Nunaata aqunneqarnerani ammasumik inuillu oqartussaaqataanerat pingaartillugu ingerlatsineq nukittorsassallugu.
- Nunatsinni inuiaqatigiit akisussaassusermik, eqeersimaarnermik peqqikkusussutsimillu pingaartitsillutik kiffaanngissuseqarlutillu ineriartornissaminnut pitsaasumik periarfissaqarnissaat qulakkeersimajauassallugu.
- Nunatsinni avatangiisit isumalluutillu uumassusillit nungutsaaliuinikkut paarilluarneqarnissaat qulakkeersimajauassallugu.
- Pilersikkumallugit Nunatsinni inuiaqatigiit nunarsuarmioqataasutut unammillersinnaasumik ilinniartitseriaaseqartut.
- Kalaallit Nunaanni Inuit pisinnaatitaaffii nunarsuarmioqatigiinnut tamanut atuuttut illersussallugit.

Siumumi siunertagut ersarissuupput, Naalagaaffinngornissaq anguniarparput, pisuussutigut uumassusillit uumaatsullu akisussaassusilimmik atorusuppagut, nunatsinni oqaatsit ataaqqineqarnissaat siuarsartuarnissaallu Siumumi pingaartipparput, siunertaraarput siunissami nunap inui imminnut napatittut pilersissallugit, kiffaanngissuseqarlutik inuit tamat oqartussaaqataanerat ataaqqillugu naqisimaneqaratillu nunarsuarmioqatitsinnut namminneerlutik isumaqatiginninniarsinnaasut.

Siumumiik taamatut aallarniuteqarluta Naalakkersuisut siulittaasuata ammaanermini oqaaseqaataa imatut oqaaseqarfingissavarput.

Silap pissusaata allanngornera

Aallartivitsinnatali oqaatigissavarput, nunatta kangiani pisoq imaannaanngimmat, nunaqqatigut eqqugaasut piterarsuup nalaani pinngitsoqarata ernumallutalu qamaniitissimassagingut qularutissaanngilaq. Aseruatitererit qanoq annertutigisut takoreerlugit ajunaarnersuaqartillugu aningaasat atorneqartussat piaartumik atuutsilersinneqassasut Siumup Inatsisartunut gruppiata kissaatigaa, tassami piteqqap kingunerisaanik ajorluinnartumik pisoqarpoq, ajunaarnersuartut oqaatigisariaqartumik. Illut igalaavi, illut qalissiaat pigisallu allat nalillit, soorlu biilit, angallatit il. il. aseruatiterput. Taamaattumik Aningaasanut Inatsimmi konto sillimmatigineqartoq, ajunaarnersuartut ittumik pisoqartillugu atuutsilersinneqartartoq, piaartumik atuutsilersillugu ikorsiisoqarluni aallartittoqassasoq Siumup kaammattuutigaa.

Silap pissusaata allanngornera nunarsuarmioqatigiittut minnerunngitsumillu issittumi annertuumik eqqugaassutigaarput. Ippassaaninnguaq naggueqatitta nunaanni

qarsutsisoqarmat inuppassuit illutik aamma annaavaat. Imaassanngilarli tunniutiinnassasugut sulimi iliuuseqarsinnaavugut mingutsitsineq inuit tamatta ataasiakkaarluta akiortuartariaqarparput. Nunarsuaq allanngorpoq, taassuma piumaffigaatigut isumatusaartumik inooriaaserput ineriartornerpullu ingerlattariaqaleripput.

Meerartatta siunissaat qanoq isikkoqassava?

Meeqqat akornanni pujortartarneq unitsinniarlugu ukiuni kingullerni annertuumik Qeqqata Kommunia suliniuteqarpoq, borgmesterimmi qularutiginngilluinnarpaa meerartatsinnut ikuuussinnaanerput annerpaaq tassaammat inersimasut meeqqanut maligassiunerat. Taamaattumik kommunimi amerlanerussuteqartut aaliangerput pisortat suliffeqarfutaanni sulinerup nalaani pujortartoqartassanngitsoq.

Meeqqat inuusuttuaqqallu pinerlunniartarnerat unitsinniarlugu sumiiffinni assigiinngitsuni immikkut suliniutit ingerlanneqarput ass. unnuami biilnik ingerlaartut meeqqanik inuusuttuaqqanillu saaffigineqarsinnaasut pilersinneqarput, angajoqqaat namminneq piumassutsiminnik suliniutillit aallartipput aamma sumiiffinni assigiinngitsuni nammineq kajumissuseq naapertorlugu Natteravnit qaammatit naanerini oorisiffinnilu illoqarfinni meeqqanut toqqissisimatitsinialrutik angalaartarput.

KILLILIISA kinguaassiuutitigut atornerluisarneq unitsinniarlugu ukiuni kingullerni Naalakkersuisut ingerlappaat taassuma saniatigut katsorsaanerit neqeroorutaapput taamatuttaaq imminut toquttarneq akiorniarlugu saaffissat annertusaaffigineqarnikuupput sulilu pisariaqarluinnarpoq ukkattuarnissaat imminummi toquttartut ajoraluartumik ikiliartunngillat soorluttaaq ukioq manna toqutsinerit qassissaa tusareerippup tamanna ilungersunarluinnartutut Siumumiit isumaqarfigaarput.

Meeraaqqap naartuulernerminiilli anaanami naavata iluani inunngorunilu peqqinnartumik toqqissimasumillu ineriartornissaai siunertaralugu angajoqqaanngortussanut meeravissiartaartussanullu MANU aqqutigalugu siunnersuineq pinaveersaartitsinerlu Naalakkersuisuugallarnitsinni aallartipparput. Tassami pingaartikkatsigu meeraaqqap naartuunerminiilli aanngajaarniutinik inuunerlunnerullu kingunerisaanik innarlerneqartannginnissaa. Sulili unammillingassaqaqaagut tassami naartutilluni aanngajaarniutinik atuisarsimanerup kinguneranik inuunerlunnerullu kinguneranik meerarpassuit timimikkut eqqarsartaatsikkullu innarlerneqartarput peqqinnissaqarfimmut, inunniik isumaginnittoqarfimmut, meeqqanut pineqartunut allarpassuarnullu pitsaanngitsumik kinguneqartartumik.

Meerartagut toqqissimasumik inuuneqarnissaat tamatta akisussaaffigaarput, piviusorli imaappoq meeqqat tamarmik angerlarsimaffimmi toqqissismaffiusumi najugaqanngimmata, taamaattumik Siumumiik Naalakkersuisunut kaammattuutigaarput

ilaqtariit angerlarsimaffii ataatsimut ineriertortitsiffiusut annerusumik politikkikkut tapersorsorneqarnissaat.

Takusareerparput inuppassuit meeraanerlussimagaluarlutik namminneq aaliangikkaminnik pitsaasumik angusaqarusullutik ingerlaqqittut, taakkupput inuunermik allannguisut siunissamullu qaamanermik tunisisut, taakkua sapinngippata aamma illit sapinngilatit.

Meeqqeriviit

Meerartagut piffissap ilarujussua angerlarsimaffiup avataaniittarput, meeraaqquerivinni, meeqqerivinni, atuarfimmi atuareernerullu kingorna ornittakkani. Pædagogit, socialhjælperit, socialassistentit ikiortillu oqitsuinnaanngitsumik atugaqarput, sulisussaaleqineq annertuumik atuuppoq taakkunani akisussaaffippassuit paarineqarmata, taamaattumik Siumumiik kaammattuutigissavarput ajornartorsiut annertusiartuinnartoq Naalakkersuinikkut immikkut iliuuseqarfigeqqullugu. Tassami isiginngitsuusaaginnarsinnaanngilarput ilinniarsimasorpassuit ilinniakkaminnik atuerusunnginnerat assigiinngitsunik tunngaveqarlutik.

Meeqqat atuarfiat ilinniartitaanerlu

Inuusuttuaqqat, meeqqat atuarfianniit aninerminniit ukioq ataaseq qaangiuttoq ilinniartitaanernik aallartitsisartut amerlassusaat arriitsumik qaffakkiartorput 2020-mi 40,3%-mik qaffasissuseqarluni. 2015-2016 meeqqat atuarfiannik aammalu ilinniartitsisunngorniartarnermik nalilersuinerup kingorna kaammattuutit assigiinngitsut ukkatarineqalerput.

Siumumi anguniarparput, sapinngisamik meeqqat tamarmik, meeqqat atuarfianniik ilinniartitaanernut ingerlaqqittarnissaat tassa GUX-imut, e-GUX-imut imaluunniit Inuussutissarsiutitigut ilinniarfinnut, inuusuttuaqqattaq aalisartuunermut piniartuunermullu ikaarsaaruttit sakkusaannik meeqqat atuarfianni inuussutissarsiutigalugulu ilinniarfinni tuniorarneqarnissaat qulakkiissarigippit isumaqarpugut.

Tamanna qulakkeerneqartariaqarpoq, oqaatsinik allanik sanngiiffeqarnerat imaluunniit angusaasa appasinnerat aporfingagu, imatut paasillugu inuusuttuaqqat tamarmik siunissami sulinermi atorsinnaasaminnik upternarsaateqarnissaat anguniartariaqarparput ilinniaqqinnisaannillu periarfissillugit. Taamaattumik Naalakkersuisunut nalilersoqqarput meeqqat atuarfianni soraarummeirluni misilitsittarneq aporfiliisunillu karakteeriliisarneq siunissami qaqugumorsuaq taamatut ingerlaannassaneroq? Ajunngilaq atuarnerup ingerlanerani piginnaasat qanoq inissisimanerat takuniarlugu misiliisarneq kisianni imaaqtariaqanngilaq soraarummeernermi karakterit tassaassasut qaqugumorsuaq inuusuttuaqqamut aporfiliisussat. Tassami nunarsuarmi qallunaallu kisiartaagunarpugut meeqqat atuarfianni soraarummeersitsilluta karakteriliisartut.

Siumumi isumaqarpugut nalileroqqinneqartariaqartoq nukagavallaat nunaqarfimmiik illoqarfimmut angajoqqaatik qimallugit sivisoorsuarmik atuariartinnejartarnerat, imaassinaannginnerluni piffiit ilaanni naturfagimut nunaqarfimmiik illoqarfimmut pikkorissariartinnejartassasut imaluunniit toqqagassillugit nunaqarfimmiiginnarluni atuarnermik naammassinninnissamut imaluunniit illoqarfiliarnissamut. Periarfissaq alla tassaavoq fysik/kemi-rtarfiit nunaqarfinni amigaataappata ilassutinik inerisaasoqassasoq alimasissumillu atuartitsinerit tassuuna inerisaaffigalugit?

Ajornartorsiut alla tassaavoq ilinniartitsisussaaleqineq, ingammik naturfagini aammalu tuluttut atuartitsiffiusuni naak kalaallit ilinniartitsisut suli amerliartoraluwartut ajornartorsiut suli annertuvoq. Taamaattumik Siumumiik oqaatigiuarparput nunani allaniik tuluttut oqalutunik ilinniartitsisunik isumaqatigiissuteqarluni atuisinnaaneq kommunit aqqtissiuussinnaaneraat?

Nunatta kangia ilinniartitaanikkut inerisaavigissallugu Siumumiit piumassuseqarpugut, inuuusuttorpassuit ingerlaqqinnissaminut periarfissagissaarnerunissaat Siumumi aqqtissiuusseqataaffigerusupparput, soorlu efterskoleqalernissaanik siunertaq suli pimoorupparput ilinniarfiillu allat pilersinneqarnissaat anguniarlugu.

Siumumiik aammaarluta kaammattutigissavarput nammineq oqaatsigut atorlugit atuartut, ilinniartut ilisimatusartullu misilitsissinnaanerat tamakkiisumik qulakkeeqquillugu Naalakkersuisut sulissuteqassasut aamma allattariarsorluni misilitsinnerit pingaluarpatluunniit apeqqutit pinngitsooratik kalaallisut nutserneqartassasut. Erseqqissaatigalugu uani pineqanngillat qallunaatut imaluunniit tuluttut misilitsinnerit kisianni atuartitsissutit allat naliginnaasut.

Ilisimatusarneq

Ukiorpaalunngorput Ilisimatusarfik nutaaq pilersinniarlugu politikkikkut isumaqatigiinngissutaaqisumik sulissuteqaratta isumaqartoqarmammi illorsuaq asuli kusassaataannartut inissismassasoq. Taamani Ilisimatusarfik nutaaq atoqqaarfissioneqarmat ammaallunga oqalugiarpunga. Ilisimatusarfiup atoqqaarfissioneraniik ulloq manna tikillugu annertuumik ineriertortoqarpoq, ukiuni kingullerni Ilisimatusarfimmi ilinniarneqarsinnaasut saniatigut Bachelorinngorniarluni ilinniartitaanerit nutaat pingasut aallartinneqarput, nutserisungorniarneq oqaluttaanerlu, Inuutissarsiornikkut aningasaqaarneq Inatsisilerinerlu. Ilisimatusartut ukiuni kingullerni marloriaatinngorput Bacheloritut, Kandidatitut Ph.d-tullu naammassisartut amerligaluttuinnarput tamannalu peqqissimissutissaananilu annertuumik tulluusimaarutissaavoq ullumikkummi takuneqarsinnaavoq taamani politikkikkut siunertaq qanoq iluatsilluarsimatiginersoq allaammi oqartoqarsinnaalluni ima iluatsilluartigisoq ilisimatusartunut inissaq amigaataalerluni. Tamatuma malitsigaa kalaallit pisortani namminersortunilu atorfillit amerlinerat. Danmarkimi akademikerit suliffissaaleqinerat

annertuvoq nunatsinnili akademikerinik pisariaqartitsinerput allarluinnaavoq nunattami sulisinnaasut kikkulluunniit pisariaqartippai. Nunatsinni qaffasissumik ilinniarsimasut suli amerlanerusut pililissagutsigit Siumumiik kaammattuitigissavarput Ilisimatusarfiup illutaa mikivallaalersoq siunissamut eqqarsaatigeqqullugu, p.hd-mut ilisimatusarlutik aallartittartut ukiumut marluinnaat aningaasaliiffigineqartarnerat ilaneqartariaqarnerallu kaammattuitigaarput aammattaaq nunatta nunanit allanit ilisimatusarfigineqarnera soqtigineqarnerujussualu aningaasarsiutaasinnaasoq eqqarsaatigilluaqqullugu.

Innarluutillit utoqqaallu

Qanittumi alianarluinnartumik innarluutillit najugaanni pisoqarpoq. Pisoq imaannaanngitsoq akuersarneqarsinnaanngitsorlu eqqarsaatigalugu tamatsinnut ernumalersitsivoq, nakkutiginninneq sukumiisoq pisariaqarpoq taamatummi pisoqaqqinnginnissaa qulakkeertariaqarparput. Siumumiit kaammattuitigaarput innarluutillit illersuisuat soleqatigalugu nakkutiginninnerup nukitorsaavigineqarnissaa sulissutigineqassasoq. Utoqqalinersianik aaqqissusseqqinneaq tamakkiisup naammassinissaa Siumumiik qilanaarivarput isumaqarattami aallaqqaataaniilli sunniuteqarluartumik aaqqiisoqassappat peqqissaartumik suliaq naammassisariaqartoq.

Aningaasaqarneq, sanaartorneq mittarfissualiorneq aamma erngup nukiganik nukissiuuteqarneq

Ilisimasatsituut conavirus aammalu ukioq manna Ukrainemut Russit sorsunnerisa kinguneranik aningaasat nunarsuatsinni naleerukkiartorput. Danskit, europamiut aammalu Amerikarmiut aningaasaataat ukiuni 40-ni aatsaat taama nalikitsigilerput.

Nunarsuarmioqatigut aningaasarsiornikkut tatineqartut nunatta eqqugaanera nunani allanituulli qaffasitsiginngilaq. Nunatsinni annerusumik suliffissaaleqisoqanngilaq inuillu ulappupput aamma ikummatissanut 2023-mut akinik isumaqatigiissuteqarneq, mittarfissualiorneq tamatumunnga tunngaviulluinnarpot tassa ikummatissanut nerisassanullu akit qaffakkiartoraluartut, atuisullu kaasarfimmui ikiligaluartut, suli nunatsinni ineriartorneq pitsasumik ingerlavooq. Naak nioqqutissat akisunerulerlauartut aalisakkanik qalerualinnillu avammut tunisassiorneq inuiaqatigiinnut iluaqutaasussamik akigissaarfiusumik ingerlalluarpoq. Sillimaffissaqarpugulli tassami nunatta karsia 3 milliardit sinnerlugit aningaasaliissuteqarpoq taakkualu ukiuni tulliuttuni marloriaatinngornissaat naatsorsutigineqarlni taakkualu saniatigut erngup nukiganik nukissorfiliornissamut 3 milliard kr. sinnerlugit taarsigassarsiaqalernissamik pilersaaruteqarfiupput. Imaappoq isertitassatut naatsorsuutigisagut ikinnerulersinnaapput aammali sanaartukkagut akisunerulersinnaallutik. Unammillernartunut ilaapput aserfallatsaaliiinermi kinguaattoorutit aningaasarpassuarnik naleqartut tamakkua tamarmik isumatusaartumik sillimaffigineqartariaqarput aaqqissusseqqinnerlu pisariaqarluinnartoq Siumumi pingaartipparput.

Nutaanilli aningaasarsiorfigisinnaasatsinnik aamma eqqarsartariaqarpugut, sermersuaq sukkasuumik aakkiartortillugu immap tarajoqarnera pitsaanngitsumik aalisakkanut sunniuteqarpooq taamaattumik sermersuaq aattoq atorluartariaqarpalput nunarsuarmioqatitsinnullu niuerutigalugu, annikitsukkaanginnarnagu kisianni umiarsuarnik imermik annertuumik assartuisinnaasunik avammut nioqqutissiornissaq aqqutissiuullugu.

Sermersuuttaaq aakkiartornerani periarfissat allat takkussuuttut eqqumaffigisariaqarpagut assersuutigalugu marraq. Imaappoq sermersuup aakkiartornerani marraq annertuallaq akuliutsillugu avatangiisinut pitsaanngitsumik sunniuteqassasoq ilisimatoq Minik Rosing qanittumi saqqummiinermini oqaatigaa, taamaattumik siunnersuutigaa marraq avammut tunisassiarissagipput soorlu nunaatilinnut naggorissaatitut atugassatut.

Assersuutit taakkartorneqarsinnaasut amerlapput taamaattoq nutaaliorluta aallartiffeqartariaqarpugut nutaanimmi aningaasanik isaatitassatsinnik pisariaqartitsivugut.

Aammattaaq nunatta ilaani aningaasanik pilersitsiviusut soorlu avannaani nunaqarfii lu taakkununnga iluaqutaasumik sulilu annerusumik isaatitsivissaannik sakkussaannillu tunisariaqarigut Siumut isumaqarpooq.

Takornariaqarneq inuussutissarsiutitigullu inerisaaneq

Mittarfissualiorpugut, piareersarneq suli naammanngerujussuarpoq. Siunissami mittarfissuit akilersinnaassappata suli annertunerujussuarpoq. Nunatsinnummi tikerartussat Ilulissat Nuullu kisiisa ornittarnavianngilaat siunertaavormi sapinngisamik amerlasuut nunatta ilaanut illoqarfinnut nunaqarfinnullu takornariarlutik ingerlaqqittassasut. Takornariaqarnermi nunaqavissut iluanaaruteqarnerpaanissaat sulissutigisariaqarpalput inatsisillu aporfilippata aaqqiiffigisariaqarpagut, tassami annerusumik piumasaqaasersunngikkutta tatineqartuartussaavugut aningaasallu isertissinnaasagut annajortussavagut.

Nunatta kangia takornariaqarnikkut inerisaav vigissallugu soqtiginarnerpaat ilagivaat, takornariammi amerlanerpaat tassaasarpalput pinngortitarsuarmi alutornartunik misigisassarsiornissaminut ujartuisartut. Taamatuttaaq nunatta avannaarsua tassaavoq immikkullarissumik misigisassarsiorusukkaanni tikinneqartariaqartoq, qaannamik piniarnermik aallussiffiusoq kiisalu qimussimik piniarnermik aamma aallussiffiusoq. Minguissuseq, nipaassuseq kusanassusersuarlu isumatusaartumik atornissaat qaffasissumillu inerisaaffiginissaat aqqutissiuunneqartariaqarpalput.

Taamaattumik takornariaqarnermut pilersaarutip naammassinissaa Siumumiit eriniglluinnarparalput pingartippalput inuuusuttatta pitsaasumik aqqutissiuunneqarnissaat.

Nunap ilaata ineriartoqqinnissaa pisariaqarpooq, sanaartornikkut aamma inuussutissarsiornikkut kommunet peqatigalugit siuarsanissaq pisariaqarmat.

Innuttaqqortussuseq najoqqutaralugu tapeeriaaseq annerusumik
inerisaanissaraluamut killiliisuusarpooq taamaattumik finmark model
Siumumiik saqqummiussimasarput qilanaaralugu timitalerneqarnissa
utaqqissavarput aamma tapeeriaatsip nalilersoqqinnissa Siumumiik
Naalakkersuisunut kaammattutigaarput.

Aalisarneq piniarneq

Kultooritta pingaaruteqarluinnartut pinngitsoorsinnaanngisattalu ilagivaat imaani nunamilu
uumassusilinnik pisuussutitsinnik nerisaqarneq inuussutissarsiuteqarnerlu.

Pisariaqarluinnarporlu inoqarfinni suliffissuaqarfiunngitsuni annerusumillu allanik
aalisarnikkut periarfissaqarfiunngitsuni piniarnermik inuuniuteq

arnerup ilaqtariinnut pineqartunut nappataasussatut inisisimanissa eqqarsaatigalugu
ataavartumik periarfissaasa pitsangorsartuarnissaat ikorfartorneqartuarnissaallu
qulakkiissallugu. Kalaaliminernik ulluinnarni pinngitsoorsinnaanngisatsinnik ukiorpassuarnilu
nerisaqarnitta kingornuttagaanerata aqqani pisariaqartitatta piffinnilu assigiinngitsuni
nerisarisaasut pisariaqarluinnartut eqqarsaatigalugit kissaatiginarpoq, atuisut
piffikkaartumik ukiorpassuarni ilisimasaasa nalilittut oqimalutaanermi atorneqartarnissaat,
taamaattumik qilalukkanik naammaginartumik pisassiisoqarnissa Naalakkersuisunut
matumuuna ilungersortumik Siumumiit kaammattutigissavarput.

Ingerlatseqatigiiffiit ammasumillu ingerlatsineq

Pisortat ingerlatsiviini ammasumik periuseqarnissaq qulakteerniarlugu, allagaatinik
takunnissinnaatitaaneq pillugu inatsit aalajangersakkallu tassunga attuumassutilit
ersarissarneqartariaqartut isumaqarpugut. Taamaalilluta tamatta periarfissinneqassaagut
ilisimalissallugu, pisortat siunnersuusiornerminni suna siunertaralugu suliaqarsimanersut,
aamma ulluinnarni ingerlatsinermi aningaasartuutit uatsinnut toqqaannaq
sunniuteqartartut qanoq inisisimatinneqarnersut. Minnerunngitsumik, pingaarnertullu,
atorfimmuit atatillugu ileqqorlussinnaanerit pinngitsoortinniarnissaanut inuiaqatigiittut
sakkussaqnarnerulernissarput siunertaralugu.

Peqqinnissaqarfik

Peqqinnissaqarfippit sulisussaaleqinermik tatineqaqqavoq. Sulisunik
amigaateqarnerujussuup kingunerisaanik nunat immikkoortuisa ilaanni ernisinnaaneq
ajornakusoorpoq. Tamanna tunngavigalugu ukiut siuliini Siumumiik oqariartutigisarparput
avataaniik aamma Danmark avataaneersunik nakorsanik peqqissaasunillu atuisariaqartugut.
Aporfiusartulli ilaat tassaavoq, oqalutsit aammalu nakorsat allattaasa tuluttut
oqalussinnaasut amigaataanerat, Siumumi isumaqarpugut nakorsat pilattaasartut
Danmarkip avataaneersut atorneqarnissaat misissorneqartariaqartoq
aqqtissiuunneqartariaqartorlu.

Sulisoqarneq

Nunarput sumiiffiit ilaanni sulisussaaqeqiffiuvoq, pisariaqartippagut inuit sulisinnaasut ilinniarsimasuuppata ilinniarsimasuunngikkaluarpataluunniit taamaattumik nunani allaniik sulisussatut pisariaqartitatta eqaannerusumik suliarineqartarnissaat anguniarlugu nunatta akisussaaffimmik tigusinissaa pisariaqartoq isumaqarpugut.

Ineqarneq

Nunatsinni nunaqarfinni, illoqarfinni isorliunerusunilu innuttaasut amerlanerusut pisortanik isumalluuteqaratik illoqalernissaat sulissutigiuartariaqarparput aammali innuttaasut ilaasa pisortanik tapiiffigineqarlutik nammaneqarsinnaasumillu illutaarsinnaanerat periarfissaajuartariaqarpoq aningaasaleeriaaserlu nalilersorneqartariaqarluni matumani kommunit suleqataanissaat avaqqunneqarsinnaanngilaq.

Nunanut allanut politikki

Nunanut allanut politiki pillugu Siumumiik ersarissumik oqariartuuteqartarpugut, nunatta nunasiatut piissusilersorfigineqarnera unittariaqartoq, ilaannakortumik akutinneqarneq isertuunneqartarnerlu taamaatilluinnartariaqalersut. Siumumiik anguniarpalut nammineerluta killilersorneqaratalu isumaqatiginninniarsinnaalernissarput.

Avataaniik nunatta soqtigineqarnerujussua atorluartariaqarparput, soorlu EU Nuummi allaffittaalerpoq, nalunngilarput suna soqtigisaat ilisimavagut ilaatigut aatsitassat. Nunarsuarmi mingutsitsineq millisarneqassappat ilaatigut aatsitassarsiornikkut nunami mingutsitseqqaarluta nunarsuarmi mingutsitsineq millisarsinnaavarput. Aatsitassat qinngorneqarpata qinngorneqanngippataluunniit nunatta pisuussutai mianerinnilluta pitsaanerusumillu siunertaqarluta atorluartariaqarpagut.

Isumaqataavugut 1951-imi isumaqatigiissut isumaqatiginninniutigineqaqqittariaqarpoq aamma nunasiaateqarsimanerup kingunerisaanik Avanersuarmiut Inuillu Nunanganiittut attaveqatigiinnerisa kipitinneqarsimasup killilersorneqaratik attaveqatigeeqqilernissamut aqqtissiuunneqarnissaat sulissutigineqassasoq piumasaraarput.

Siumumiik taamatut oqaaseqarluta akisussaaqataanerput qimarratiginagu tigummilluguli, suliagut aningaasanut inatsimmi timitalerlugit ingerlateqqissavagut, upperigatsigu nunarput innuttaminit tamakkiisumik oqartussaaqeqigineqarluni naalagaaffinngornissamut ineriartulersoq. Tamanna angussavarput inuiaat ilissi peqatigalusi.

Qujanaq

Doris J. Jensen, Siumut